

SIARAN MEDIA

TINDAKAN TEGAS TERHADAP PERSATUAN YANG GALAKKAN KARTEL

KUALA LUMPUR, 21 DISEMBER – Suruhanjaya Persaingan Malaysia (MyCC) melahirkan rasa kesal terhadap tindakan terkini beberapa persatuan yang mengumumkan kenaikan harga atau menetapkan harga minima perkhidmatan atau barangan termasuk mengenakan syarat perdagangan baru yang didapati memberi kesan negatif secara langsung kepada kos sara hidup rakyat. Perkara ini amat membimbangkan kerana ia melibatkan sektor-sektor penting antaranya pengangkutan, perkhidmatan jagaan, kesihatan dan makanan yang merupakan keperluan asas rakyat.

MyCC memandang serius akan perilaku persatuan-persatuan yang galak membuat pengumuman kenaikan harga atau harga minima atau syarat perdagangan baru terutamanya melalui media tanpa memikirkan impak yang menambahkan lagi cabaran kelangsungan hidup rakyat. Pengumuman sebegini boleh dikategorikan sebagai suatu perjanjian antipersaingan atau kartel kerana ia mencerminkan suatu keputusan ahli jawatankuasa persatuan yang pada masa sama merupakan pesaing-pesaing dalam industri. Ia juga boleh dikategorikan sebagai isyarat daripada persatuan kepada ahli-ahlinya dalam menyebarkan luas keputusan yang telah ditetapkan dengan tujuan untuk memastikan ahli-ahli menjayakan perlakuan kartel secara bersepadu.

MyCC mengambil maklum bahawa berlakunya peningkatan kos perniagaan di dalam dan luar Malaysia. Walau bagaimanapun, dalam usaha perusahaan-perusahaan mencari penyelesaian kepada peningkatan kos perniagaan, mereka tidak boleh mengambil jalan mudah dengan bersekongkol untuk menaikkan harga atau menetapkan harga minima atau mengenakan syarat perdagangan baru yang akan menaikkan harga. Keputusan sedemikian sepatutnya dilakukan secara bebas dan tanpa arahan atau keputusan Persatuan. Mereka tidak boleh berselindung di sebalik jawatan-jawatan persatuan mereka atau keahlian mereka di dalam persatuan. Jawatan atau keahlian itu bukan satu lesen untuk menghalalkan perlakuan kartel masing-masing.

MyCC telah banyak menyasat ahli jawatankuasa serta ahli-ahli persatuan dan didapati mereka menggunakan platform persatuan untuk menggalakkan pembentukan kartel di kalangan mereka. Baru-baru ini, MyCC telah mengenakan penalti kewangan sebanyak RM415.5 juta terdapat 5 syarikat pengeluar makanan ayam dan salah satu bukti yang diperolehi melalui penyiasatan MyCC adalah mereka menggunakan platform Malaysian Feedmillers Association untuk mereka berkumpul lantas memulakan serta memperkukuhkan lagi perlakuan kartel mereka melalui pertukaran maklumat tentang kos dan harga.

Justeru, MyCC ingin memaklumkan bahawa pihaknya sudah membuka beberapa kertas penyiasatan terhadap beberapa persatuan serta ahli jawatankuasa termasuk ahli-ahli persatuan yang disyaki terlibat dalam perlakuan kartel. Maklumat di lapangan yang diperolehi daripada saluran media utama dan platform sosial media menunjukkan bahawa ada persatuan, melalui ketua mereka, cuba mengaburi mata rakyat dengan menyatakan pengumuman kenaikan itu hanyalah jangkaan kenaikan untuk masa hadapan atau harga panduan walhal pengumuman itu sebenarnya adalah hasil keputusan persatuan yang berbaur kartel. MyCC juga tidak terkejut jika ada persatuan yang membuat keputusan secara rahsia dengan harapan tindakan mereka tidak dapat dikesan kerana mereka sedar perkara tersebut melanggar perundangan persaingan.

MyCC kekal komited, tanpa gentar atau pilih kasih, untuk melindungi kepentingan pengguna dan memastikan wujudnya persaingan sihat dalam pasaran. Tindakan MyCC akan ditumpukan kepada mana-mana perusahaan tidak kira besar atau kecil selagi mereka menunjukkan perilaku atau elemen kartel. Melalui pindaan Akta Persaingan 2010 yang akan dibentangkan pada awal tahun depan, kuasa penyiasatan dan penguatkuasaan MyCC akan diperkasakan lagi untuk memastikan perilaku sabotaj ekonomi seperti ini ditangani dengan lebih efektif melalui penalti yang lebih berat.

MyCC mengalu-alukan kerjasama daripada ahli jawatankuasa atau ahli-ahli persatuan yang tidak bersetuju dengan tindakan persatuan yang mengamalkan perlakuan kartel serta orang awam termasuk agensi-agensi Kerajaan yang mempunyai maklumat mengenai sebarang cubaan atau tindakan yang menjurus kepada pembentukan kartel oleh persatuan-persatuan

**UNTUK SIARAN SEGERA
MEJA BERITA / EKONOMI**

di bawah seliaan mereka. Maklumat tersebut boleh disalurkan melalui saluran rasmi iaitu <https://www.mycc.gov.my/bm/membuat-aduan> atau emel ke complaints@mycc.gov.my untuk tindakan lanjut. Pengadu juga dialu-alukan untuk menggunakan saluran alternatif seperti surat, panggilan telefon atau memfailkan aduannya di pejabat MyCC. MyCC menjamin kerahsiaan pengadu dan pemberi maklumat.

Tan Sri Dato' Sri Idrus bin Harun
Pengerusi
Suruhanjaya Persaingan Malaysia

-tamat-

Untuk pertanyaan media, sila hubungi:

Bahagian Polisi dan Komunikasi
Telefon Bimbit: +6019 269 6037
Emel: pcd@mycc.gov.my

Mengenai Suruhanjaya Persaingan Malaysia (MyCC)

Ditubuhkan pada April 2011 melalui Akta Suruhanjaya Persaingan 2010, Suruhanjaya Persaingan ialah satu badan bebas bertanggungjawab untuk menguatkuasakan Akta Persaingan 2010 (Akta 712), yang dilaksanakan untuk melindungi proses persaingan yang seterusnya akan merangsang produktiviti, keusahawanan yang berterusan dan inovasi dalam kalangan perusahaan, lantas mewujudkan pilihan produk atau servis yang lebih banyak kepada pengguna dan kualiti yang lebih baik pada harga yang berpatutan.

Akta 712 ini terpakai kepada semua aktiviti perdagangan yang dijalankan di dalam dan di luar Malaysia yang memberi kesan kepada persaingan dalam pasaran Malaysia. Ia menyediakan kerangka pengawalseliaan termasuk kuasa untuk menyiasat, menghakimi, dan mengenakan hukuman kepada pelaku-pelaku yang melanggar undang-undang persaingan.

MyCC telah menyambut ulangtahun yang ke-13 pada 1 April 2024 dan sehingga kini, MyCC telah mengambil tindakan tegas terhadap hampir 100 syarikat berkaitan dengan kartel dan penyalahgunaan kedudukan dominan yang telah dengan jumlah keseluruhan penalti kewanganyang telah dikenakan melebihi RM570 juta. Keutamaan semasa MyCC adalah termasuk meminda Akta untuk memperkenalkan rejim kawalan penggabungan, menumpukan usaha kepada kartel tipuan bida, kartel dalam sektor makanan dan pertanian, serta menangani cabaran yang dihadapi oleh perundangan dan dasar persaingan berikutan ekonomi digital.

Untuk maklumat lanjut mengenai MyCC, sila layari laman sesawang www.mycc.gov.my